

Ikalaata iya Paulo kwa  
**Tiito**  
**Uwandi**lo

UTiito áamile Muyunaani we ápindushile. Akhikhalaga nu Paulo kwonti kwe akhabhalaga kulumbiilila iNtumi iNyinza. Pílongolela, uPaulo akhamusonteelezya kulongozya ivibhanza mu nsi iya mu Kileete.

Mwi kalaata ili, uPaulo akumubhuuzya uTiito kubhasebha abhantu bhe bhali ni njendo inyinza kulongozya ivibhanza. Khabhili akubhabhuuzya she bhakwanziwa kubhamanyizya abhantu mu shibhanza. Bhe bhali mu vipuga iwva vikholo ivwinji, anzi mpuga iya bhasakhaala abhagoosi, abhantanda abhagoosi, abhatunta na bhatumwa. Kuwumalilishilo akumukumbusya uTiito kuti aBhakilisiti bhonti bhabhe nu wutengaanu, khabhili bhabhe bhatonsu. Bhatabhanje nu wulugu na madali, khabhili bhatagabhunhanaje.

Zye zili mu shitaabu ishi
UPaulo akumulamukha uTiito
Imbombo ya Tiito iya kulwila iNtumi iNyinza na kuzikhaana imanyizyo
Imanyizyo ku zya bhantu abha vikholo vwonti
UPaulo akumukumbusya izya wuposhi uwupiti, ni zya kumalilishizyo

*Indamukho*

<sup>1</sup> Ine ne Paulo, umubhombi wa Mulungu, umusundikwa wa Yeesu Kilisiti, neene inkukusimbila iwe Tiito. Ansonteleziizye ku bhantu bhe uMulungu abhasabhuuye wuuyo kuti, bhabhe nu lwitikho,

bhawu manye uwanalyoli wonti we wukuleeta injendo inyinza mwa Mulungu. <sup>2</sup> Ulwitikho nu wanalyoli wunuwuwo, vikusimishizya ku lusubhilo kuti, bhakhawaaje uwuumi uwa wiila na wiila. Kunongwa ye mu khabhalilo khe insi yashiili kupelwa, uMulungu alajile kuutupa uwuumi wunuwuwo, khabhili uweene atakulonga lilenga. <sup>3</sup> Pe shiniisho, mu khabhalilo khe ayiganile we khaafikha, akhabhamanyisa abhantu intumi inyinza kwi dala ilya kulumbilila kwani. Umulungu uMuposhi wiitu wuuyo we alajiziizye kuti indumbililaje.

<sup>4</sup> Iwe Tiito, we inkukusimbila ziniizi, wumwana waani nalyoli mu lwitikho lwe tukusanganila. Utaata uMulungu nu Muposhi wiitu uYeesu Kilisiti bhakulolelaje uwiila, na kuukupa uwutengaanu.

### *Imbombo ya Tiito mu Kileete*

<sup>5</sup> Zye nakulesheeye panaapo pa Kileete, yamile kuti ulingaanye zyonti zye zyasyaliliye, na kubhabhikha abhasongo mu vibhanza iwwa mu nhaaya zyonti, anza she nakulajiziizye. <sup>6</sup> Wowonti we atibhanje musongo wa shibhanza, akhondeeye kuti bhatamudwegaje imbiibhi naazimo. Abhe nu mushi weeka mwene, atasungukhaje abhantanda abhanji. Abhaana bhaakwe bhakhondeeye kuti bhabhanje nu lwitikho, bhatabhanje na mapuli. <sup>7</sup> Umwimiilili unu akhondeeye kuti bhatamudwegaje imbiibhi naazimo, kunongwa ye akubha asabhuliilwe nu Mulungu kubhomba imbombo yaakwe. Khabhili atabhanje muntu we ali na mabaado, awe we akuvitwa nalubhilo. Khabhili atabhanje mumwezi, awe we akukhoma abhantu, awe we wu navigane wa vintu. <sup>8</sup> Lyoli akhondeeye kuti abhe muntu we muteti ku bhajeni, aziganaje zye nyinza, ayijelaje, abhombaje

izya wugolosu, na kubha muntu umufinjile we ali nu lubhaatikho. <sup>9</sup> Alemelejaje amazwi aga nalyoli, anza she twámanyiye, inga abhagomwe abhanji mu ganaago, abhatolaje bhe bhakudindanjila.

<sup>10</sup> Kunongwa ye kuli abhantu abhinji mu Kileete bhe bhatakutinikha imanyizyo izya nalyoli, inhaani bhe bhitishile bhe bhafumile mu Bhayahuudi bhe bhakusundiilila aminho gaabho. Amazwi gaabho ku kulonga izya khasa bhulo na kukhopelana. <sup>11</sup> Bhanaabho bhakhondeeye kuti, bhapinywe amalomu gaabho. Kunongwa ye kumanyizya amazwi ge gatakhondeeye, bhakunanganya ulwikho lwi nhaaya inyinji izya bhe bhitishile. Ge gaku bhaazya bhanaabho abhakhopeli kubhomba ganaago, ku kuti bhapatilaje mumwo inhela!

<sup>12</sup> Bhanaabho aBhakileete, weeka mu bhakuwi bhaabho bhiiibho álonjile átili, “ABhakileete bhakulonga izya malenga insiku zyonti, bhali anzi vikhanu ivikhali ivibhiibhi, bhaliipo abhakhata bhe bhakulya ku wupafu.” <sup>13</sup> Amazwi ganaago ge galonjiilwe ku bhiiibho ga nalyoli. Pe shiniisho, ubhakhajile nhaani inga bhakhaagome mu lwitikho. <sup>14</sup> Khabhili bhakhondeeye kuti bhaleshe kutejeelezya utupango twa Bhayahuudi, ni ndajizyo zye zya bhishiilwe na bhantu bhe bhakuwukhaana uwanalyoli. <sup>15</sup> Ku bhantu bhe bhagolosu pamiiso ga Mulungu, khataliipo akhantu naakhamu khe khangabhabhikha kubha bhakhandamanu. Heelo, ku bhantu bhe bhakhandamanu, na bhe bhatakumusuubhila uYeesu Kilisiti, ivintu vwonti ukwabho vikubha vikhandamanu. In-

jeele zya**h**o ni nsii**h**o zya**h**o zyonti nhandamanu.\*  
 16 Bhakuyilonjela **k**uti bhamumanyile u**M**ulungu, ileelo **k**u njendo zya**h**o, bhak**u**mukhaana. Bhakumuviisya nhaani, khabhili bhatakumutinikha, bhatali ni njendo inyinza naazimo zye zikhondeeye.†

## 2

Zye zikhondeeye **k**u bhantu abha shibhanza

1 Ileo*lo* iwe Tiito, **u**manyizyaje abhantu uwanalyoli inga bhabhanje ni njendo inyinza. 2 Abhasakhaala abhagoosi, **u**bhamanyizye **k**uti bhabhe bhantu bha **l**ubhaatikho mu lutinikho. Bhayidindaje **k**uti bhatakhahombe imbiibhi. Bhagomaje **m**u lwitikho, **m**u lugano, na mu wujimbiilizu.

3 Bhoope abhantanda abhagoosi, **u**bhamanyizye **k**uti bhayisungaje, anza she yikhondeeye **m**u bhantu bha **M**ulungu, bhatastenhanaje, khabhili bhatabhanje bhamwezi. Lyoli bhakhondeeye **k**umanyizya zye nyinza, 4 inga bhabhasunde abhantanda abhatunta **k**uti, bhabhaganaje abhalume bhaabho na bhaana bhaabho. 5 Khabhili bhayidindaje ku mbiibhi mu wufinjile wonti. Bhabhombaje imbombo iya mu nyumba zya**h**o, bhabhombelanaje inyinza, na kubhatinikha abhalume bhaabho. Bhabhombaje shiniisho inga izwi lya **M**ulungu litakhalongwe akhabhiibhi **k**u njendo zya**h**o.

---

\* 1:15 1:15 Injeele zya**h**o ni nsii**h**o zya**h**o zyonti nhandamanu Abhamanyizyi abhi lenga bhakhamanyizyaga **k**uti idala iya **k**umukhondezya **u**Mulungu **k**u kulandata aminho gaabho, anza **k**ukhaana kulya iwakulya vimo. Inga abhantu bhatakulandata, bhakhatinji bhak**u**bha bhakhandamanu. † 1:16 1:16 Bhaazya 2 Tiimoti 3:5.

<sup>6</sup> Abhasakhaala abhatunta bhoope, ubhasundaje **ku**ti bhayijelaje. <sup>7</sup> Iwe **wu**neewe **ub**hombaje akhinza mu zyonti, ufishile **ku**bha shikholanyo ishinza **ku**kwabho. **Mu** khabhalilo khe **u**timanyizyaje abhantu, **ub**hamanyizyaje mu wanalyoli, sita matona. <sup>8</sup> Amazwi gaakho gabhe ga nalyoli, inga **mu** khabhalilo khe abhantu bhakhayilinga **ku**ti bhakudinde, bhakhayipootwa izwi ilya kutulijila, pe bhakhayisuupila.

<sup>9</sup> Abhatumwa, **ub**hamanyizye **ku**ti bhabhatinikhaje abhapiti bhaabho mu zyonti, na **ku**bhakhondezya. We abhapiti bhaabho bhak**ub**habhuuzya zimo, bhatasiitaje. <sup>10</sup> Bhatiibhaje akhantu naakhamu **ku** bhapiti bhaabho. Lyoli bhalolesyaje injendo izya **ku**su**ub**hilwa ku zyonti **ku**ti, zye bhak**ub**homba zikhondezyaje abhantu inga bhayiganaje **ku**zitejeelezya imanyizyo zya **Mu**lungu uMuposhi wiitu.

<sup>11</sup> Ubhamanyizyaje ganaago **ku**nongwa ye **u**Mulungu alolesiizye uwiila **u**wa wuposhi waakwe **ku** bhantu bhonti. <sup>12</sup> Uwiila **wu**nu**u**wo **wu**ku**tu**manyizya **ku**zilekha zyonti zye te zya **Mu**lungu, ni **nu**sungukho izya **mu** nsi. We **tu**kwikhala **mu** nsi umu, **tu**yijelaje, **tu**bhanje twe bhasunde, na kwikhala kwi dala lye likhondeeye pamiiso ga **Mu**lungu. <sup>13</sup> Twikhalaje shiniishi we **tu**ku**gu**ulila kwinda kwa Yeesu Kilisiti mu wumwamu uwinji, we Muposhi wiitu **nu** **Mu**lungu wiitu **u**Mupiti. Ulu lwe **lu**su**ub**hilo lwitu lwe lukuutupa **u**luseshelo. <sup>14</sup> UYeesu we ayifumwizye **ku**nongwa **yi**itu inga **at**u**u**le mu mbi-bhi zyonti, na kutuzelufwa **tu**bhe twe bhantu bhaakwe bhe bhak**u**yikungula **ku** makha **ku**bhomba inyinza.

<sup>15</sup> Amazwi ganaago ge **u**timanyizyaje abhantu. Ubhagamwaje amooyo, na **ku**bhasokha **ku** waamulo wonti. Utakhiitische **ku**ti abhe umuntu **u**wa **ku**ku**sh**oolanya.

## 3

*Injendo* izya Shikilisiti

<sup>1</sup> Ubhakupambusye abhantu kuti bhayisyaje ku bhasongo na ku bhapiti, na kubhatinikha. Bhayinganyaaaje kubhomba imbombo zyonti zye nyinza. <sup>2</sup> Patakhabe umuntu we akusenha, awe we ali ni bho, lyoli bhajimbaje mu wutonsu ku bhantu bhonti.

<sup>3</sup> Ku khabhalilo khe khashilile, niitwe twamile twe bhalema sita lutinikho. Anza she twakhopeliilwe, tukhalemwaga mu nsungukho izya vikholo ivwinji. Tukhazilanaga na kulolelana umwone, tukhapatwaga na kubhapata abhanji.

<sup>4</sup> Heelo, kuli na mazwi ge gakuti, “Umulungu uMuposhi wiitu akhalolesya ishisa shaakwe nu lugano, <sup>5</sup> kunongwa iya kutupokha. Kutaliipo bhaati kuti twamile ni njendo izya wugolosu, lyoli atuposhile ku shisa shaakwe buulo. Akhatuzelufwa imbiibhi zyitu kwi dala ilya kutupaapa shipwa, tukhabha twe bhapwa mwa Mupepu uMufinjile. <sup>6</sup> Umulungu atwitiye uMupepu uMufinjile ku winji kwi dala lya Yeesu Kilisiti, uMuposhi wiitu. <sup>7</sup> Shiniisho she tubhaziliilwe uwugolosu pamiiso gaakwe ku wiila waakwe, akhatubhiikha kubha twe bhaana bhaakwe twe tukusubhila kuposheela uwu-umi uwa wiila na wiila.” <sup>8</sup> Amazwi ganaago gakhondeeye kwitishilwa. Inkwanza kuti ugasundililaje ku bhe bhakumwitikha umulungu, inga insiku zyonti bhasiibhaje na kuyifumwa kubhomba imbombo inyinza. Ganaago ge minza, kabhili ge gakwavwa ku bhantu bhonti.

<sup>9</sup> Peeka na ganaago, uyefwaje na madali aga shilema, kutekha amataawa ga bhafwe weeka weeka, awe kudalinhana ku gaala ge gali mu ndajizyo, awe uwulumanyi uwunji. Kunongwa

ye ganaago gonti gatakwavwa naakhamu, lyoli ga khasa bhawulo! <sup>10</sup> Umuntu wowonti we akulumanya abhantu, umusokhaje, poope khabhili khonti. Inga atakusaajila, umwefwaje mu shibhanza. <sup>11</sup> Kunongwa ye umuntu anza wunwuyo, umanyile akhinza kuti ananjishile, akubha mubhomba mbiibhi, ayilonjile wunwuyo.

*Amazwi aga kulagana*

<sup>12</sup> Inamwuye kwikhala mu nhaaya iya mu Nikopooli mu khabhalilo akhi mpepu. Akhabhalilo khe inhayimusonteelezya uAlitema awe uTikiiko kukwakho, ukhalaganye kwinda ku Nikopooli uku, inga tukhomaane kunuuku. <sup>13</sup> Ubhombe ku makha gonti kwamwavwa uZeenasi, ula we akulambila abhantu, nu Apoolo kuti bhatakhahulilwe akhantu naakhamu we bhakushuula kulumbilila iNtumi iNyinza. <sup>14</sup> Abhantu bhiitu bhamanyilaje shiila she bhatibhombaje imbombo inyinza, kuti bhaabhape abhantu abhanji ivintu vwe bhakuvwanza insiku zyonti. Pe abhantu bhiitu bhatibhakhondezyaje abhanji mu wiikhalo waabho.

<sup>15</sup> Abhantu bhonti bhe tuli peeka, bhakukulamukha. Niiwe, utulamushile abhamwitu mu lwitikho abha mu Kileete bhe bhatuganile. Uwiila wa Mulungu wubhe peeka niimwe mwenti.

ULufingo uLupwa ku ndongo iya Shimalila  
Malila: ULufingo uLupwa ku ndongo iya Shimalila (New  
Testament+)

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 13 Jun 2022

3aa8e7a3-f258-5182-ab3f-fbc6f725bb06